



**KOORDINACIONI ODBOR ZA KONTROLU MALOG I LAKOG NAORUŽANJA U
BOSNI I HERCEGOVINI**

IZVJEŠTAJ

**o radu Koordinacionog odbora za kontrolu malog i lakog
naoružanja u Bosni i Hercegovini za 2017. godinu**

**Sarajevo
Februar, 2018. godine**

Koordinacioni odbor za kontrolu malog i lakog naoružanja u Bosni i Hercegovini, na osnovu člana 7. Odluke o imenovanju Koordinacijskog odbora za kontrolu malog i lakog naoružanja u Bosni i Hercegovini („Službeni glasnik BiH“ broj 95/13), Vijeću ministara Bosne i Hercegovine, p o d n o s i

IZVJEŠTAJ

o radu Koordinacionog odbora za kontrolu malog i lakog naoružanja u BiH za 2017. godinu

I - UVODNE NAPOMENE

Vijeće ministara Bosne i Hercegovine je u skladu sa Zakonom o Vijeću ministara Bosne i Hercegovine („Službeni glasnik BiH“ br. 30/03, 42/03, 81/06, 76/07, 94/07 i 24/08), na 69. sjednici održanoj dana 12.11.2013. godine, donijelo Odluku o imenovanju Koordinacionog odbora za kontrolu malog i lakog naoružanja u Bosni i Hercegovini (u daljem tekstu: KO SALW).

II - SASTAV KO SALW

KO SALW je interesorno tijelo, formirano od deset institucija i policijskih agencija iz cijele Bosne i Hercegovine. U KO SALW je imenovan sekretar koji obavlja stručne, tehničke, administrativne i opće poslove.

III – NADLEŽNOSTI KO SALW

Djelokrug poslova i zadataka KO SALW je planiranje, koordinacija, usmjeravanje i nadzor aktivnosti za implementaciju Strategije za kontrolu malog oružja i lakog naoružanja u Bosni i Hercegovini (2016-2020).

IV - IZVRŠENJE ZADATAKA IZ NADLEŽNOSTI KO SALW

Strategija za kontrolu malog oružja i lakog naoružanja u BiH za period 2016-2020. godina, je usvojena na 71. sjednici Vijeća ministara BiH, koja je održana 31. avgusta 2016.godine. Donošenju navedene strategije prethodilo je održavanje nekoliko radionica, gdje su predstavnici KO SALW sa predstavnicima međunarodnih organizacija (UNDP, OSCE, SEESAC), zajednički usaglasili tekst strategije i akcionog plana.

Strategija predstavlja sveobuhvatan dokument kojem je cilj unaprijeđenje efikasnosti svih subjekata u oblasti kontrole malog oružja i lakog naoružanja. Strategija predstavlja nastavak i proširenje aktivnosti kojima je cilj daljnje jačanje efikasnosti svih subjekata u oblasti kontrole malog oružja i lakog naoružanja u Bosni i Hercegovini. Posebno je usmjerena na nastavak usklađivanja zakonodavstva s međunarodnim standardima, daljnje unapređenje kontrole unutrašnjeg i vanjsko-trgovinskog prometa oružja, smanjenje incidenata počinjenih oružjem i broja nelegalnog oružja u posjedu građana, unapređenje građanskog povjerenja u institucije u Bosni i Hercegovini na svim nivoima vlasti, kao i smanjenje viškova malog oružja i lakog naoružanja u posjedu Ministarstva odbrane Bosne i Hercegovine. Posebna pažnja je usmjerena na jačanje cjelokupnih administrativnih kapaciteta svih nadležnih tijela Bosne i Hercegovine. Implementacijom zacrtanih strateških ciljeva i daljnjim razvojem međunarodne i regionalne saradnje u ovoj oblasti, Bosna i Hercegovina će doprinijeti ne samo unapređenju opšte bezbjednosti u zemlji nego i u regionu i globalno.

Strategija obuhvata četiri oblasti koje su formulisane u četiri strateška cilja, i to:

1. Unaprijeđenje pravnog okvira i implementacije SALW zakonodavstva;
2. Smanjenje prisustva nelegalnog SALW-a;
3. Upravljanje SALW-om u posjedu Oružanih snaga BiH i
4. Međunarodna i regionalna saradnja i saradnja sa organizacijama civilnog društva.

U izvještajnom periodu, KO SALW je održao ukupno pet (5) zajedničkih sastanaka, a imajući u vidu strateške oblasti navedene u akcionom planu nove strategije, realizovane su sljedeće aktivnosti i to:

Cilj 1. UNAPRIJEĐENJE PRAVNOG OKVIRA I IMPLEMENTACIJE SALW ZAKONODAVSTVA

Programski cilj 1.1. Izrada analize stanja o usklađenosti domaćeg zakonodavstva u oblasti SALW

U okviru navedenog strateškog cilja Strategija je prepoznala potrebu praćenja aktivnosti koje trebaju rezultirati harmoniziranjem zakona o držanju i nošenju oružja u BiH sa relevantnim propisima Evropske unije kao i jačanja međuagencijske saradnje na polju implementacije zakonodavstva vezanog za kontrolu unutrašnjeg i spoljnotrgovinskog prometa oružja radi adekvatne razmjene informacija i stajališta u vezi sa pitanjima iz nadležnosti različitih institucija uključenih u promet naoružanja.

Nakon što je Vijeće ministara BiH usvojilo „Informaciju o realizaciji aktivnosti vezanih za usklađivanje odnosno harmonizaciju zakona o oružju u BiH“, KO SALW je u izvještajnom periodu pratio aktivnosti u smislu realizacije navedene informacije.

S tim u vezi, KO SALW je tokom 2017. godine, koordinirao aktivnosti kako bi svi navedeni zakoni o oružju bili usklađeni sa Direktivom o oružju Vijeća EU.

U sklopu realizacije navedenog strateškog cilja na posljednjoj TAIEX radionici koja se održala u Sarajevu 14 i 15. septembra 2017. godine, na temu usklađivanja zakona o oružju u BiH sa direktivom Vijeća EU 91/477, 51/2008 i 2017/853 ekspertska pomoć pružili su eksperti iz Republike Slovenije. Tokom radionice izvršena je analiza postojećeg zakonodavstva o oružju u BiH te prezentirane nove izmjene direktive u ovoj oblasti.

Istaknut je značaj harmonizacije propisa o oružju, a posebno značaj ove oblasti u kontekstu obaveza Bosne i Hercegovine navedenih u poglavlju 24. Sporazuma o stabilizaciji i pridruživanju - Pravda, sloboda, sigurnost. S tim u vezi naglašene su obaveze koje proizilaze iz Direktiva EU, a koje moraju biti inkorporirane u zakonodavstvo Bosne i Hercegovine, a samim tim i u oblasti oružja.

Predstavnici kantonalnih ministarstava unutrašnjih poslova, Ministarstva unutrašnjih poslova Republike Srpske i Policije Brčko distrikta Bosne i Hercegovine su tokom radionice prezentovali trenutno stanje u oblasti usklađenosti zakona o oružju sa međunarodnim standardima.

Nakon izloženih prezentacija, konstatovano je da je deset institucija uskladilo zakone o oružju sa Direktivom Vijeća 91/477/EEZ i 51/2008/EEZ u pitanjima koja se odnose na definicije oružja, kategorizaciju oružja, izgled isprava o oružju i kaznene odredbe. Zakoni o oružju usklađeni su u Kantonu 10, Kantonu Sarajevo, Tuzlanskom kantonu, Hercegovačko neretvanskom kantonu, Srednjobosanskom kantonu, Zeničko-dobojskom kantonu, Zapadnohercegovačkom Kantonu, Bosansko podrinjskom Kantonu, Republici Srpskoj i Brčko distriktu BiH. Pored toga, konstatovano je da su i druga bitna pitanja koja tretira gore navedena Direktiva o kontroli nabavke i posjedovanja oružja, tretirana pomenutim zakonima (elektronski registri, definicija brokera, norme kojima se tretira trofejsko i kolekcionarsko oružje, deaktivacija oružja itd.).

U narednom periodu, a nakon što Skupštine Unsko sanskog i Posavskog kantona usvoje Zakone o oružju, biće neophodno navedene zakone o oružju u BiH uskladiti sa najnovijom Direktivom Vijeća broj 2017/853.

U izvještajnom periodu usvojeno je nekoliko značajnih akata u oblasti kontrole malog i lakog oružja. Donesena su tri podzakonska akta iz oblasti kontrole vanjskotrgovinskog prometa roba i usluga od strateške važnosti za sigurnost BiH i to: Pravilnik o vođenju registra lica vanjskotrgovinskog prometa oružja, vojne opreme i robe posebne namjene;

- Pravilnik o obliku i sadržaju isprava u vanjskotrgovinskom prometu oružja, vojne opreme i roba posebne namjene i
- Uputstvo o uslovima i postupku za izdavanje isprava u vanjskotrgovinskom prometu oružja, vojne opreme i roba posebne namjene.

Formirana je radna grupa za izradu podzakonskih akata iz Zakona o obilježavanju malog oružja, lakog naoružanja i pripadajuće municije.

Programski cilj 1.2. Jačanje kapaciteta u borbi protiv nelegalne trgovine SALW-om;

Pripadnik Državne agencije za istrage i zaštitu, koji je i član KO SALW učestvuje u radu Zajedničkog komiteta eksperata za vatreno oružje Evropske Unije (EFE) i grupi eksperata za vatreno oružje zemalja jugosistočne Evrope (SEEFEG) sa ciljem diskusije o aktivnostima na provođenje operativnog akcionog plana između Evropske Unije i zemalja Jugoistočne Evrope u borbi protiv nezakonite trgovine vatrenim oružjem.

Također, u 2017 godini, vršena je nabavka specifične opreme potrebne za jačanje kapaciteta u borbi protiv nelegalne trgovine SALW-om.

Uprava za indirektno-neizravno oporezivanje je aktivno sudjelovala u regionalnim i međunarodnim naporima za kontrolu malog i lakog oružja, za poboljšanje provođenja suštinskih instrumenata i mehanizama o malom i lakom naoružanju. Tokom 2017 godine, službenici UIO su učestvovali na više obuka i seminara putem programa EXBS, UNODC, EU, P2P u vezi sa sprječavanjem krijumčarenja oružja. Pored navedenog službenici Uprave za indirektno oporezivanje aktivno su učestvovali u međunarodnim operacijama sprječavanja krijumčarenja oružja u organizaciji INTERPOL-a, EUROPOL-a i FRONTEX-a. Predstavnici UIO su također u 2017 godini, održali sastanke sa predstavnicima UNDP, SEESAC I EXBS u cilju unaprjeđenja dalje saradnje i poboljšanja operativnih procedura u vezi sa kontrolom uvoza/izvoza i sprječavanjem krijumčarenja malog oružja i lakog naoružanja.

U okviru međunarodne operativne policijske saradnje sprovedene su i četiri operativne akcije koje su se odnosile na borbu protiv ilegalne trgovine oružjem i eksplozivnim sredstvima i to:

- Operativna akcija kodnog naziva „JAD WB 2016“ koja je realizovana u periodu od 27-29.01.2017 godine u organizaciji EUROPOL-a. Akcija je imala za cilj borbu protiv ilegalne trgovine oružjem i eksplozivnim sredstvima a u njoj su učestvovali sve policijske agencije u BiH, te Uprava za indirektno oporezivanje. Direkcija za koordinaciju policijskih tijela BiH i Granična policija su u ovoj akciji učestvovali u radu Operativnog centra u Europolu.

- Operativna akcija TRIGGER II, koja je realizovana u periodu od 06.04.-08.04.2017.godine u organizaciji Generalnog sekretarijata Interpol-a, sa ciljem borbe protiv ilegalne trgovine oružja, droge i organizovanog kriminala. Učešće u akciji uzele su 23 zemlje Evrope uključujući i BiH. U Direkciji za koordinaciju policijskih tijela BiH formiran je koordinacioni centar za BiH sa predstavnicima agencija iz BiH (DKPT, GPBIH, MUP RS-a, FMUP-a), dok su se regionalni koordinacioni centri nalazili u Skoplju, Minsku i Pragu, a glavni koordinacioni centar bio je u sjedištu Interpol-a u Lionu.

- Operativna akcija kodnog naziva „KALIBAR“ koja je realizovana u periodu od 17.11-18.11.2017.godine u organizaciji EUROPOL-a, čiji je fokus bio borba protiv ilegalnog oružja i eksplozivnih sredstava, uz učešće jednog broja agencija za sprovođenje zakona (DKPTBIH, GPBIH, MUP RS, FMUP) čiji su predstavnici zaplijenili veću količinu naoružanja. Direkcija za koordinaciju policijskih tijela BiH bila je koordinator operativne akcije u BiH.

U akcijama koje je predvodila Policija BDBiH (kao što je međunarodna akcija "Povratnik", "Maska", "Spavač" i drugo) u kojima je pronađeno različito oružje, građanima je ukazivano na štetnosti posjedovanja istog.

Ministarstvo unutrašnjih poslova Republike Srpske u saradnji sa policijom Kraljevine Švedske i Republike Austrije, a pod nadzorom Tužilaštva BiH, tokom 2017. godine realizovao je ranije započetu međunarodnu akciju kodnog naziva „Arma“ zbog postojanja osnova sumnje da je izvršeno krivično djelo „Neovlašten promet oružjem i vojnom opremom te proizvodima vojne upotrebe“ iz člana 193 KZ BiH i dr., kom prilikom je privremeno oduzeta određena količina oružja

Ministarstvo unutrašnjih poslova Republike Srpske u saradnji sa policijom Republike Srbije, Upravom kriminalističke policije, dana 20.10.2017. godine, realizovalo je aktivnosti na rasvjetljavanju krivičnih djela, zbog postojanja osnova sumnje da su izvršena krivična djela „Nedozvoljena proizvodnja, držanje, nošenje i promet oružja i eksplozivnih materija iz člana 348 stav 3 Krivičnog zakonika Republike Srbije i krivično djelo „Nedozvoljena proizvodnja i promet oružja ili eksplozivnih materija“ iz člana 361. Krivičnog zakonika Republike Srpske kom prilikom je privremeno oduzeta određena količina oružja i municije.

Službenici Granične policije BiH učestvovali su na sljedećim obukama:

U organizaciji Agencije za školovanje i stručno usavršavanje kadrova održana obuka na teme: "Postupanje s improviziranim eksplozivnim sredstvima", Mostar, u dva termina tokom 2017 godine, kojoj je prisustvovalo 10 p/s,

Granična policija BiH u saradnji sa J.P Međunarodnim Aerodrom Sarajevo, održali kurs na temu: "Rad sa opasnim materijama", Sarajevo, u vremenskom periodu od 04.04.-14.04.2017. godine, kojem je prisustvovalo 5 p/s,

U organizaciji Vlade SAD-e (EXBS – program) održana obuka na temu: "Kontrola teretnih vozila, autobusa i putničkih vozila u cilju otkrivanja krijumčarene robe, narkotika, oružja, novca i ljudi", Čapljina, u vremenskom periodu od 30.05.-01.06.2017. godine, kojoj su prisustvovala 2 p/s,

U organizaciji Vlade SAD-e (EXBS – program) održana obuka na temu: "Pretraživanje skrivenih odjeljaka u vozilima", Podgorica, Crna Gora, u vremenskom periodu od 12.06.-16.06.2017. godine, kojoj je prisustvovao 1 p/s,

U organizaciji Ministarstva bezbjednosti BiH i CEPOLA održan kurs na temu: "Rješavanje pitanja vatrenog oružja na spoljnim granicama Evropske unije", Prag, R. Češka, u vremenskom period od 12.09.-15.09.2017. godine kojoj je prisustvovao 1 p/s,

U organizaciji UNODC uz saradnju sa UNDP, održana obuka na temu "Identifikacija vatrenog oružja i njihovih sastavnih dijelova", Beograd, R.Srbija, u vremenskom periodu od 19.12.-20.12.2017. godine, kojoj je prisustvovalo 5 p/s.

Programski cilj 1.3. Unaprijeđenje informacionih sistema za kontrolu SALW-a;

Nadležne institucije su radile na unapređenju informatičkih sistema predviđenih provedbenim propisima iz ove oblasti. U Ministarstvu sigurnosti BiH kontinuirano se koristi Centralna elektronska evidencija o kontroli kretanja oružja i vojne opreme u BiH. U ovaj sistem uvezane su policijske agencije na entitetskom nivou, te ova evidencija predstavlja osnov za prikupljanje i analizu podataka o kretanju oružja i vojne opreme u BiH.

Prema podacima iz ovog sistema u 2017 godini, je zaprimljeno i izdato 680 Rješenja kojim se odobrava kretanje oružja i vojne opreme. Od tog broja rješenja za izvoz je bilo 425, a za uvoz 255. prema podacima iz ovog sistema, povećanje od **9,68%** za 2017.godinu, u odnosu na 2016.godinu. Najviše podnesenih zahtjeva za izdavanje odobrenja odnosi se na četiri privredna subjekta i to: UNIS GINEX dd Goražde 169, POBJEDA TECHNOLOGY dd Goražde 102, IGMAN dd Konjic 83, KM TRADE d.o.o Visoko 52.

Također, u 2017. godini, je zaprimljeno i izdato 301 predhodnih suglasnosti na Rješenja kojima se odobrava kretanje oružja i vojne opreme unutar Bosne i Hercegovine između entiteta, kantona i entiteta i Brčko distrikta BiH, a za čiju su provedbu mjerodavni entiteti, kantoni odnosno Brčko distrikt BiH. Evidentno je povećanje broja izdatih saglasnosti od 14,89% za 2017.godinu, u odnosu na 2016.godinu.

Odlukom o određivanju međunarodnih graničnih prijelaza za promet naoružanja i vojne opreme, opasnih, eksplozivnih i radioaktivnih tvari i sredstava dvojne namjene („Službeni glasnik BiH“ broj 89/06, 48/08, 35/13 i 61/15) određeni su granični prijelazi za promet oružja i vojne opreme. Analizom Zahtjeva za odobrenje kretanja oružja i vojne opreme došlo se do podataka na kojim se graničnim prijelazima najčešće vrši izvoz/uvoz, i to: GP Aerodrom Sarajevo 231, GP Vardište 175, GP Orašje 154, GP Rača 53, GP Klobuk 12, GP Gradina 10, GP Čapljina 12, GP Kamensko 9, GP Izačić 4 i GP Gradiška 13.

Instrukcijom o posebnim mjerama sigurnosti prilikom kretanja oružja i vojne opreme („Službeni glasnik BiH“ broj 95/16) su propisane mjere koje se izriču u slučajevima prijevoza robe koja može uticati na javnu sigurnost. Mjere se izriču da ne bi došlo do zlouporabe robe koja sadrži veće količine opasne materije ili oružja većeg kalibra (minibacači, haubice, mine raznih kalibara).

U 2017. godini posebne mjere sigurnosti naložene su 283 puta i to 271 mjera pratnje pripadnika policije i 12 mjera obavezne tehničke pratnje. U 2016.godini naložene su 223 posebne mjere i to 16 puta naložena je mjera neprekidnog trajanja prijevoza, 199 puta mjera pratnje pripadnika policije i 8 mjera obavezne tehničke pratnje.

U 2017. godini izvršeno 12 redovnih i vanrednih nadzora i pokrenuta su tri prekršajna postupka od kojih su dva i okončana u 2017. godini.

U Ministarstvu vanjske trgovine i ekonomskih odnosa je uspostavljena baza podataka o svim izdatim dozvolama za uvoz/izvoz naoružanja i vojne opreme u skladu sa Zakonom o kontroli vanjskotrgovinskog prometa roba i usluga od strateške važnosti za sigurnost. Ovi podaci dostavljaju se u vidu Izvještaja Vijeću ministara BiH i Parlamentarnoj skupštini BiH.

U cilju provedbe sporazuma sa INTERPOLOM o korištenju informacionog sistema Iarms (Ilicit Arms Records and tracing Management System) Direkcija za koordinaciju policijskih tijel BiH pokrenula je inicijativu za realizaciju projekta IARMS u BiH.

U dosadašnjem periodu Direkcija za koordinaciju policijskih tijela BiH potpisala je Sporazume o korištenju IARMS sa 12 od ukupno 15 policijskih agencija u BiH. Sporazum još uvijek nije potpisan sa MUP-om RS-a, MUP-om HNK i PBD BiH.

Kada je u pitanju implementacija Sporazuma o elektronskoj razmjeni podataka iz evidencije o nabavljanju, držanju i nošenju oružja, sistem je uspostavljen 12.07.2013 godine i od tada uredno funkcioniše. U julu 2017 godine, sistem je tehnički unaprjeđen po pitanju performansi kao i dostupnosti. Putem ovog sistema se, pored ostalih razmjenjuju i Evidencije potraga za oružjem te Evidencije o registrovanom oružju. Podatke za ove evidencije daju policijske agencije koje su vlasnici podataka, tj Federalna uprava policije, Kantolani MUP-ovi, Policija Brčko Distrikta BiH, MUP Republike Srpske, a pravo provjere imaju svi učesnici sistema razmjene. Centralna tačka sistema elektronske razmjene smještena je u Direkciji za koordinaciju policijskih tijela BiH ali Direkcija nije korisnik sistema.

Programski cilj 1.4. Unaprijeđenje kontrole unutrašnjeg i vanjskotrgovinskog prometa SALW-om;

Praćenje međunarodnih standarda i usklađivanje domaće legislative u oblasti vanjskotrgovinskog prometa i proizvodnje oružja i vojne opreme obavlja se kontinuirano. Zakon o kontroli vanjskotrgovinskog prometa oružja i vojne opreme i roba posebne namjene kao i podzakonski propisi koji proizilaze iz ovog Zakona, usklađeni su sa trenutnim relevantnim međunarodnim dokumentima UN i EU kojima se rukovodi kontrola izvoza vojne tehnologije i opreme kao i ograničavanje određenih vrsta konvencionalnog oružja.

Održano je nekoliko tematskih sastanaka i okruglih stolova sa ciljem razmjene informacija i unapređenja međuagencijske saradnje te saradnje sa privrednim subjektima u oblasti vanjskotrgovinskog prometa i proizvodnje.

U toku 2017.godine Ministarstvo vanjske trgovine i ekonomskih odnosa BiH obavilo je 80 inspeksijskih pregleda kod pravnih lica registrovanih za proizvodnju naoružanja i vojne opreme.

Cilj 2. SMANJENJE PRISUSTVA NELEGALNOG SALW-a

Programski cilj 2.1. Praćenje statističkih podataka iz oblasti SALW;

KO SALW je tokom 2017.godine, radio i na prikupljanju statističkih podataka o legalno registrovanom oružju u BiH. Ova aktivnost je značajna iz razloga što u BiH postoji 12 zakona o oružju zbog čega se podaci o tome vode na različite načine i u skladu sa različitim metodološkim pristupima.

Ukupan broj registrovanog oružja za 2016.i 2017. godinu,

2016. godina		2017 godina	
FEDERACIJA BiH	168.548	FEDERACIJA BiH	190.588
REPUBLIKA SRPSKA	168.550	REPUBLIKA SRPSKA	132.113
BRČKO DISTRIKT BIH	4.226	BRČKO DISTRIKT BIH	4.124
UKUPNO BIH	341.324	UKUPNO BIH	326.825

Na slijedećoj tabeli prikazani su uporedni podaci za 2016 /2017 godinu o broju legalno registrovanog oružja (entiteti, kantoni, Brčko Distrikt BiH):

2016		2017	
MINISTARSTVO UNUTRAŠNJIH POSLOVA UNSKO-SANSKOG KANTONA	22.552	MINISTARSTVO UNUTRAŠNJIH POSLOVA UNSKO-SANSKOG KANTONA	30.805
MINISTARSTVO UNUTRAŠNJIH POSLOVA POSAVSKOG KANTONA	3.534	MINISTARSTVO UNUTRAŠNJIH POSLOVA POSAVSKOG KANTONA	3.579
MINISTARSTVO UNUTRAŠNJIH POSLOVA TUZLANSKOG KANTONA	37.415	MINISTARSTVO UNUTRAŠNJIH POSLOVA TUZLANSKOG KANTONA	38.462
MINISTARSTVO UNUTRAŠNJIH POSLOVA ZENIČKO-DOBOJSKOG KANTONA	20.246	MINISTARSTVO UNUTRAŠNJIH POSLOVA ZENIČKO-DOBOJSKOG KANTONA	21.470
MINISTARSTVO UNUTRAŠNJIH POSLOVA BOSANSKO-PODRINJSKOG KANTONA	6.491	MINISTARSTVO UNUTRAŠNJIH POSLOVA BOSANSKO-PODRINJSKOG KANTONA	6.662
MINISTARSTVO UNUTRAŠNJIH POSLOVA SREDNJOBOSANSKOG KANTONA	12.614	MINISTARSTVO UNUTRAŠNJIH POSLOVA SREDNJOBOSANSKOG KANTONA	17.807
MINISTARSTVO UNUTRAŠNJIH POSLOVA HERCEGOVAČKOG-NERETVANSKOG KANTONA	20.220	MINISTARSTVO UNUTRAŠNJIH POSLOVA HERCEGOVAČKOG-NERETVANSKOG KANTONA	19.871
MINISTARSTVO UNUTRAŠNJIH POSLOVA ZAPADNOHERCEGOVAČKOG KANTONA	20.780	MINISTARSTVO UNUTRAŠNJIH POSLOVA ZAPADNOHERCEGOVAČKOG KANTONA	21.040
MINISTARSTVO UNUTRAŠNJIH POSLOVA KANTONA SARAJEVO	20.285	MINISTARSTVO UNUTRAŠNJIH POSLOVA KANTONA SARAJEVO	26.474
MINISTARSTVO UNUTRAŠNJIH POSLOVA KANTON 10	4.411	MINISTARSTVO UNUTRAŠNJIH POSLOVA KANTON 10	4.418
MINISTARSTVO UNUTRAŠNJIH POSLOVA REPUBLIKE SRPSKE	168.550	MINISTARSTVO UNUTRAŠNJIH POSLOVA REPUBLIKE SRPSKE	132.113
POLICIJA BRČKO DISTRIKTA BIH	4.226	POLICIJA BRČKO DISTRIKTA BIH	4.124
UKUPNO	341.324	UKUPNO	326.825

*navedeni podaci prikupljeni su iz odgovora na Upitnik EK koje su dostavljali nadležni organi

Cijeneći bitnost statističkih podataka u ovoj oblasti KO SALW je svojim aktivnostima prikupio informacije sa terena vezane za izdavanje dozvola za uvoz/izvoz SALW-a, broj slučajeva i ukupne količine zaplijenjenog SALW-a na graničnim prelazima, podatke o uništenom oružju kao i o kampanjama i redovnim aktivnostima na prikupljanju oružja.

Ministarstvo vanjske trgovine i ekonomskih odnosa Bosne i Hercegovine je u toku 2017. godine, izdalo 111 dozvola za uvoz malog oružja i lakog naoružanja i 193 dozvolu za izvoz malog oružja i lakog naoružanja.

Kako bi se mogli pratiti trendovi u ovoj oblasti, tokom 2017. godine, započeta je aktivnost na sprovođenju regionalnog istraživanja o malom i lakom oružju kako u BiH tako i u regionu a u okviru sprovođenja odluke Savjeta Evropske unije 2016/2356/CFSP usvojene 19. decembra 2016. godine.

Regionalni centar za kontrolu malog i lakog oružja (SEESAC) u saradnji sa nadležnim institucijama u BiH, je započeo realizaciju navedene aktivnosti, a cilj ovog regionalnog istraživanja je da se doprinese sveobuhvatnom i aktuelnom razumijevanju izazova kontrole malog i lakog oružja u jugoistočnoj Evropi, što će dodatno podržati relevantne institucije u primjeni politika kontrole naoružanja zasnovanih na činjenicama.

Podaci će se prikupiti za period 2012-2016.godinu, i predstavljace podršku institucijama u procesu usklađivanja sa obavezama izvještavanja proisteklih iz različitih međunarodnih ugovora i sporazuma.

Programski cilj 2.2. podizanje svijesti o rizicima SALW-a;

Ministarstvo sigurnosti Bosne i Hercegovine je kroz obraćanja ministra i zamjenika ministra i predstavnika u KO SALW, na svim događajima i obraćanjima, a u cilju podizanja svijesti građana, ukazivalo na problem nelegalnog oružja i minsko eksplozivnih sredstava u Bosni i Hercegovine.

Kroz nadležnu organizaciju Ministarstva sigurnosti Bosne i Hercegovine, a u saradnji sa međunarodnim organizacijama u Bosni i Hercegovini, provedene su aktivnosti u značajnom broju osnovnih škola i općina, gdje se, u prvom redu učenicima, nastavnicima i građanima, govorilo o opasnostima od minsko-eksplozivnih sredstava i oružja.

Ministarstva unutrašnjih poslova u Bosni i Hercegovini provodili su aktivnosti usmjerene ka smanjenju nelegalnog oružja i minsko eksplozivnih sredstava u posjedu građana, u cilju podizanja svijesti građana o negativnim stranama posjedovanja oružja, te mogućnosti dobrovoljnog predavanja oružja nadležnim policijskim agencijama.

Na području Brčko Distrikta BiH, kroz projekat "rad policije u zajednici" policijski službenici su na terenu u razgovorima sa građanima ukazivali o SALW-u, mogućnostima predaje oružja i zakonski predviđenim sankcijama za nelegalno posjedovanje oružja. Ostvarena je i saradnja sa timom za deminiranje, gdje je u školama i u mjesnim zajednicama ukazivano učenicima i građanima o mogućim posljedicama SALW-u. Predstavnik KO SALW je u avgustu 2017. godine, održao prezentaciju polaznicima „Ljetne policijske škole“, gdje se, pored ostalog, razgovaralo i o problemima vezanim za malo i lako oružje. Tokom 2017. godine, kroz rad policije u zajednici od strane policijskih službenika izvršena su predavanja u

9 osnovnih škola na temu opasnosti od minsko eksplozivnih stvari, kojom prilikom je predavanje odslušalo 500 učenika.

Na području Republike Srpske, tokom 2017.godine policijski službenici su u okviru svojih redovnih poslova i zadataka posebno skretali pažnju građanima o opasnostima i rizicima od nezakonite upotrebe oružja a posebno u vrijeme praznika i organizovanih javnih skupova. Također, u sklopu ovih aktivnosti organizovana su gostovanja u emisijama RTRS i drugih emitera u okviru preventivnih kampanja na opasnosti koje nosi nezakonita upotreba pirotehničkih sredstava i oružja. U okviru kampanje „Petarde nisu igračke u saradnji sa školskim ustanovama održano je niz predavanja na temu zloupotrebe pirotehničkih sredstava i oružja. Također, slične preventivne aktivnosti su se provodile kroz forume za sigurnost građana gdje su policijski službenici PU Banja Luka, Trebinje, Foča, Bijeljina, Istočno Sarajevo i Doboj na ukupno 26 održanih sastanaka kao jednu od tema obrađivali i nezakonitu upotrebu oružja i zloupotrebu pirotehničkih sredstava.

Programski cilj 2.3. Prikupljanje i uništavanje nelegalnog SALW-a;

Kada su u pitanju aktivnosti vezane za prikupljanje i uništavanje nelegalnog SALW-a prema dostupnim podacima koje je KO SALW prikupio, podaci su slijedeći:

Federalno ministarstvo unutrašnjih poslova je oduzelo 4 komada teškog oružja, 72 automatske puške, 13 poluautomatskih pušaka, 27 pušaka M 48, 84 lovačke puške, 51 ostalu vrstu pušaka, 292 pištolja, 5 automatskih pištolja, 3 tromblonske mine, 3 protivoklopna oruđa, 42 ručne bombe, 18.845 petardi, 20 drugih eksplozivnih naprava i sredstava, 473 noža mača sablje i sl, 43 boksera, 677 drugih predmeta pogodnih za nanošenje tjelesnih povreda., 13.259 metaka i 3,655 kg eksploziva.

Tokom 2017. godine, Državna agencija za istrage i zaštitu je imala 7 slučajeva nelegalnog držanja oružja u posjedu građana, a privremeno su oduzete 23 različite puške, 13 pištolja različitog kalibra, 2260 komada municije različitog kalibra, 7 ručnih bombi, 9 optičkih nišana za puške, 3 kubure - pištolja, 1 prigušivač, 19 okvira za automatsku pušku, 3 okvira za pištolj, 7 noževa - bajoneta i 21 komad sporogorećeg štapina.

Granična policija BiH u okviru svojih aktivnosti u 2017.godini je zaplijenila je 48 komada SALW-a , 24 dijelova SALW-a i 1245 kom. municije na graničnim prijelazima.

Tokom 2017. godine, na području Brčko Disktrikta BiH oduzete su slijedeće količine oružja i municije:

1. oružja oduzeto po osnovu vođenja krivičnih, prekršajnih i upravnih postupaka...95 kom,
2. oružje po osnovu dobrovoljne predaje na uništenje od građana.....42 kom,
3. oružje po osnovu predaje na uništenje od deminerskog tima policiji.....16 kom,
4. municija raznog kalibra:631 kom,
5. minsko-eksplozivna sredstva:11 kom,
6. okvirovi za municiju (komada):68 kom .

U skladu sa Odlukom o formiranju Komisije uz prethodno dobijenu saglasnost ministra unutrašnjih poslova Republike Srpske, izvršeno je prikupljanje: 1959 komada naoružanja, od toga: (kratkog naoružanja - 740 komada, dugog naoružanja - 1187 komada i startnih pištolja - 32 komada); 1845 komada dijelova oružja i opreme (okviri za oružje, mehanizmi za zatvaranje i dr.); 3890 metaka, od toga: (472 pištoljskih metaka 7,62 mm; 2192 pušanih metaka 7,62 mm; 514 pušanih metaka 7,9 mm i 712 pušanih metaka 43 inča) i 1 komad - ručni bacač, te 1 komad odskočne - školske mine.

Tokom 2017. godine, KO SALW je u saradnji sa svim policijskim agencijama u BiH ukupno realizovao tri akcije uništavanja malog i lakog oružja (april, juli i decembar), a sve tri akcije su provedene uz podršku Evropske komisije, UNDP-a i Regionalnog centra za kontrolu malog i lakog oružja (SEESAC).

Navedenim aktivnostima podsjetili smo građane Bosne i Hercegovine na opasnosti koje prijete od oružja koje je proglašeno viškom, od slabo osiguranog ili nezakonitog oružja i koliko to oružje utiče na njihovu sigurnost.

Realizacijom svih navedenih akcija dat je veliki doprinos poboljšanju cjelokupne stabilnosti kako u BiH tako i u regionu pa i šire.

Tokom 2017. godine, u navedenim aktivnostima **ukupno je uništeno 10.801 komada i dijelova oružja**, što predstavlja izuzetan rezultat u odnosu na protekle godine. Posebno je značajno naglasiti da je prikupljanje i uništavanje navedene količine malog i lakog oružja rezultat uspješnog rada svih policijskih agencija u Bosni i Hercegovini u borbi protiv ilegalne trgovine oružjem. Koliko je ovo značajan rezultat govori i činjenica da smo u periodu od 2013-2016. godina, kada je provođena koordinirana kampanja podizanja svijesti građana na prikupljanju i zbrinjavanju nezakonitog naoružanja diljem zemlje, ukupno prikupili i uništili preko 11.000 komada i dijelova malog i lakog oružja.

2.4 „Unapređenje kapaciteta za čuvanje, skladištenje i uništavanje SALW-a u policijskim agencijama“

U okviru realizacije aktivnosti predviđenih Strategijom za kontrolu malog oružja i lakog naoružanja (2016-2020) sa pripadajućim Akcionim planom, a u vezi sa ciljem 2. „Smanjenje prisustva nelegalnog malog oružja i lakog naoružanja“ – 2.4. unapređenje kapaciteta za čuvanje, skladištenje i uništavanje SALW-a u policijskim agencijama, službenici Ministarstva sigurnosti BiH su u periodu septembar/oktobar 2016 godine, izvršili obilazak skladišta u ministarstvima unutrašnjih poslova u Bosni i Hercegovini radi utvrđivanja trenutnog stanja i prijedloga za unapređenje standarda za čuvanje oružja i municije u skladištima policijskih agencija u BiH. Nakon obavljenog obilaska, sačinjena je analiza o trenutnom stanju infrastrukture u navedenim skladištima koja je prezentovana članovima Koordinacionog odbora za kontrolu malog oružja i lakog naoružanja kao i predstavnicima Regionalnog centra za kontrolu lakog oružja u jugoistočnoj Evropi (SEESAC). Službenici koji su vršili obilazak imali su za cilj da utvrde postojanje minimalnih standarda koji su propisani Standardima EU. Obzirom da su ovi standardi jako rigorozni, i vrlo teško primjenjivi u našoj zemlji, vodilo se računa o minimalnim standardima nepohodnim za što sigurnije čuvanje i upravljanje zalihama SALW-a. Posebno se vodilo računa o fizičkoj sigurnosti, odnosno procedurama koje su osmišljene da se spriječi neovlašten pristup objektima, opremi i sredstvima, i da se zaštiti osoblje i imovina od

oštećenja i povreda. Također, utvrđivalo se stanje vezano za sigurno evidentiranje, skladištenje, transportovanje i postupanje sa SALW-om.

Regionalni centar za kontrolu lakog oružja u jugoistočnoj Evropi (SEESAC) je u sklopu projekta Evropske komisije vezanom za *Unapređenja sigurnosti skladišnih kapaciteta policijskih agencija BiH za čuvanje SALW-a i municije*, kao i soba za odlaganje dokaza (SALW i municije), osigurao određena novčana sredstva za poboljšanje navedene infrastrukture.

S tim u vezi, KO SALW je na sastanku održanom 06.06.2017.godine, zaključio, a na osnovu prethodno sprovedene analize, da bi najkorisnije bilo da se navedena sredstva ulože u skladu sa slijedećim:

U Federaciji Bosne i Hercegovine da se unaprijedi infrastruktura na lokacijama:

- Skladište Rakovica-Sarajevo (Federalno Ministarstvo unutrašnjih poslova) i (MUP Kantona Sarajevo);
- Soba za dokaze u Ministarstvu unutrašnjih poslova Posavskog Kantona (Orašje);
- Soba za dokaze u Ministarstvu unutrašnjih poslova Hercegovačko nerevtanskog Kantona (Mostar).

U Republici Srpskoj da se unaprijedi infrastruktura na lokacijama:

- Skladište u PU Bijeljina;
- Soba za dokaze u PU Bijeljina.

Planirano je da se realizacija aktivnosti vezanih za rekonstrukciju navedenih skladišta i soba za dokaze okonča do kraja 2018.godine.

Cilj 3. UPRAVLJANJE SALW-OM U POSJEDU ORUŽANIH SNAGA BIH

Programski cilj 3.1. Rješavanje viškova SALW-a u posjedu OS BiH;


Ministarstvo odbrane BiH je realizovalo operacije demilitarizacije MiMES-a za 2017. godinu, u skladu sa Planom operacija sa MiMES-a, i u skladu sa Odlukama Predsjedništva BiH i to:

- demilitarizacija 1.690,63 tone različitog MiMES-a koje je demilitarizovano kroz tehnološke postupke delaboracije, termičke obrade i detonacije na otvorenom;
- donacija 88,028 tona poduzeću „Vitezit“ Vitez;
- donacija 50.000 komada municije 7,62x39 mm Ministarstvu unutrašnjih poslova Republike Srpske, Banja Luka;
- donacija 50.000 komada municije 7,62x39 mm, Federalnom ministarstvu unutrašnjih poslova;
- donacija 30.000 komada municije 7,62x39 mm, MUP Unsko-sanskog Kantona.

Operacije demilitarizacije realizovane su kroz kapacitete kojima raspolažu OS BiH. Ove operacije nisu uključivale angažiranje kapaciteta namjenske industrije u BiH niti korištenje regionalnih kapaciteta. Implementacija projekta EXPLODE, pod pokroviteljstvom

EU uz angažiranje UNDP je okončana 29.marta 2017. Uporedo sa završenim projektom EXPLODE je otpočela i traje realizacija projekta EXPLODE+ koji financiraju vlade Savezne Republike Njemačke i Kraljevine Nizozemske. Pokrenut je takođe projekat EU STAR kao nastavak projekta EXPLODE koji je u potpunosti financiran od strane EU u iznosu od 2.999.216,31 USD, a implementirat će se u periodu od 01.06.2017. do 30.11.2019. godine.

Kriva uništenja/demilitarizacije municije u periodu 01.01.2006.-31.12.2017.



U 2017. godini Ministarstvo odbrane nije vršilo uništavanje malog oružja i lakog naoružanja (SALW) iz kategorije viškova za OS BiH.

Kontinuirano se saraduje sa Državnom agencijom za istrage i zaštitu i sudovima u BiH na preuzimanju i uništavanju SALW-a izuzetog iz krivičnih dijela, prilikom čega se isto uništava u sklopu kapaciteta sa kojima raspolažu OS BiH.

Zaključkom Predsjedništva BiH iz januara 2016. godine, zaduženo je Vijeće ministara BiH da pokrene proceduru izrade sustavnog dokumenta kojim će se regulisati skladištenje, čuvanje i uništavanje oružja i MiMES-a oduzetog u sudskim procesima, a što je i učinjeno na 65. Sjednici Vijeća ministara BiH održanoj dana 21.07.2016. godine, na način da je formirana Interresorna radna skupina za izradu dokumenta koji će cjelovito i sistemski regulirati gore navedenu oblast.

Ministarstvo odbrane Bosne i Hercegovine trenutno u skladištima Oružanih snaga BiH raspolaže sa 16.164,77 tona (bruto) razne municije i MES-a i sa cca 40.000 komada naoružanja, a koje je kategorisano kao višak. Postupak rješavanja istog realizira se u skladu sa principima rješavanja viškova, definiranim Odlukom Predsjedništva Bosne i Hercegovine (prodaja, donacija, uništavanje).

Programski cilj 3.2. Kontrola i nadzor rješavanja viškova SALW-a u posjedu OS BiH;

Ministarstvo odbrane je u skladu sa Odlukom Predsjedništva BiH, a na osnovu Sporazuma o konačnom raspolaganju svim pravima i obavezama nad pokretnom vojnom imovinom (2008. godina - Doboj), formiralo Komisiju za vođenje postupka rješavanja viškova pokretne vojne imovine (naoružanje i MiMES). Nadležnost Komisije je donošenje odluka o načinu i modalitetima rješavanja viškova (prodaja, donacija i uništavanje) kao i kontrola navedenih modaliteta.

Formiran je i Strateški komitet za naoružanje, municiju i minsko-eksplozivna sredstva, koji predstavlja tijelo utemeljeno sa primarnom svrhom za rješavanje viškova naoružanja, municije i minsko-eksplozivnih sredstava koja su pod kontrolom Oružanih snaga Bosne i Hercegovine.

U radu ovog komiteta kao punopravni članovi pored predstavnika MO i OS BiH učestvuju i predstavnici NATO u BiH, EUFOR-a, UNDP-a u BiH, OSCE-a u BiH, delegacije EU u BiH, Ambasade SAD u BiH, Ambasade Švicarske u BiH, Ambasade Austrije u BiH, Ambasade Njemačke u BiH, Ambasade Švedske u BiH, Ambasade Velike Britanije u BiH.

Tokom 2017. godine održano je 8 (osam) zasjedanja Strateškog komiteta za naoružanje, municiju i minsko eksplozivna sredstva.

Programski cilj 3.3. Unapređenje kapaciteta za skladištenje i čuvanje SALW-a u posjedu OS BiH;

Ministarstvo obrane BiH raspolaže sa 5 perspektivnih skladišta u kojima je uskladišteno 8.139,12 tone SiMES-a i 7 neperspektivnih skladišta u kojima je uskladišteno 7.535,15 tona SiMES-a i 3 tranzitna skladišta u kojima je uskladišteno oko 490,50 tona SiMES-a.

Ministarstvo odbrane BiH je okončalo projekat SECUP BiH u saradnji sa Misijom OSCE-a u BiH te u januaru 2017. godine, pokrenulo projekat SAFE UP. Projektom će se osigurati instalacija paketa IDS na lokaciji Kula-2-Mrkonjič Grad, osigurati PP zaštita na četiri lokacije skladištenja municija i TROM Doboj, dalje opremanje laboratorije za ispitivanje hemijske stabilnosti baruta kao i monitoring nad rezultatima projekta SECUP na lokacijam Krupa, i Kula-1 radi obezbjeđenja njihove održivosti od strane MO i OS BiH.

Programski cilj 3.4. Unapređenje informacionih sistema za kontrolu SALW-a u posjedu OS BiH;

Ministarstvo odbrane BiH posjeduje informacioni sistem DARE Version 4.0 koji služi za kontrolu kvantitativnog stanja naoružanja, municije i MES-a. Ažuriranje evidencije po istom se vrši svakodnevno, odnosno prilikom svakog „pokretanja“ naoružanja, municije i MES-a.

Cilj 4. MEĐUNARODNA I REGIONALNA SARADNJA I SARADNJA SA NEVLADINIM ORGANIZACIJAMA

Programski cilj 4.1. Multilateralna i bilateralna suradnja na planu kontrole SALW-a;

Ministarstvo inostranih poslova Bosne i Hercegovine u sklopu svojih redovnih aktivnosti prati ispunjavanje međunarodnih obaveza Bosne i Hercegovine preuzetih u skladu sa međunarodnim pravnim i političkim instrumentima u okviru međunarodnog pravnog poretka.

Ministarstvo inostranih poslova BiH u svom radu posebnu pažnju posvećuje aktivnostima u sferi sigurnosnih izazova koji se tiču malog oružja i lakog naoružanja identifikovanim u relevantnim dokumentima UN-a, OSCE-a i Evropske Unije.

Rukovodeći se obavezama koje proističu iz ATT (Arms Trade Treaty), globalnog Sporazuma o trgovini oružjem, Ministarstvo inostranih poslova sprječava međunarodni transfer oružja koji bi doveo do ozbiljnog kršenja ljudskih prava, međunarodnog humanitarnog prava, povreda propisa Vijeća sigurnosti UN-a u vezi sankcija i embarga, te drugim međunarodnim obavezama kod oružanih sukoba, transnacionalnog organizovanog kriminala i terorističkih aktivnosti. U skladu sa tim BiH redovno izvještava o ostvarenim transferima oružja po upitnicima UN, OSCE i ATT.

U 2017 godini, ostvarena je saradnja institucija BiH sa EU i njemačkom specijalizovanom agencijom BAFA rezultirala je nastavkom EU programa P2P za kontrolu izvoza roba dvostruke namjene za period 2017-2020 godina. Provođenje programa povjereno je Konzorciju sastavljenom od eksperata iz Francuske i BAFA-e.

U saradnji sa EXBS programom Vlade SAD-a konstantno je vršeno osposobljavanje osoblja carine i državnih službenika uključenih u proces licenciranja, odnosno kontrole izvoza oružja i proizvoda dvojne namjene.

Također, uspostavljena je saradnja sa Wasenarskim aranžmanom i ista se konstantno unapređuje. U oktobru 2017 godine, BiH je bila domaćin izvjestiocima Wasenarskog aranžmana u vezi kandidovanja BiH za članstvo, gdje su izvjestioci upoznati sa zakonskim rješenjima, unutrašnjim problemima i drugim aspektima kontrole izvoza. Pored navedenog delegacija BiH redovno učestvuje na godišnjem brifingu za nečlanice WA posvećen izmjenama i razvoju kontrolnih listi.

U protekloj godini od strane unutrašnjih organizacionih jedinica Sektora za međunarodnu operativnu policijsku saradnju, Direkcije za koordinaciju policijskih tijela BiH, postupano je po zahtjevima međunarodnih organizacija, sa kojim je saradnja u nadležnosti Direkcije, i država članica tih organizacija, kao i na osnovu zahtjeva domaćih nadležnih organa u cilju sprječavanja i rasvjetljavanja krivičnih djela u vezi sa ilegalnom trgovinom vatrenim oružjem i eksplozivnim sredstvima. Također u 2017. godini, poslato je i 66 zahtjeva za praćenje putem iARMS aplikacije za 14 komada vatrenog oružja zapljenjenog od nadležnih organa BiH. S tim u vezi, u ovoj godini postupano je po 150 novih predmeta vezano za navedenu problematiku, od toga 20 zahtjeva domaćih policijskih agencija koje zahtjevaju međunarodnu saradnju kao i postupanje po predmetima iz prethodnih godina.

Predstavnik Ministarstva sigurnosti BiH i Direkcije za koordinaciju policijskih tijela BiH učestvovali su 08. i 09.06.2017. godine, na otvaranju „SIRAS“ projekta u Bukureštu, koji

je osnovan od različitih organizacija članica Europske Unije, trećih zemalja i međunarodnih zemalja koje rade na spriječavanju ilegalne trgovine oružjem u Jugoistočnoj Evropi.

Obzirom da je jedan od SELEC-ovih ciljeva otkrivanja ilegalne trgovine oružjem, ova organizacija je pozvana za sudjelovanje u realizaciji ovog projekta. Vodeći podnositelj zahtjeva i koordinator ovog projekta je Rumunjska policija, a koaplikanti su Bugarska, Albanija, Bosna i Hercegovina i Italija. Ministarstvo sigurnosti BiH i Direkcija za koordinaciju policijskih tijela BiH su koordinatori projekta za BiH i prate provedbu ovog projekta.

U maju i novembru 2017. godine, predstavnici KO SALW učestvovali su na dva regionalna sastanka o malom i lakom oružju, na kojim su se razmatrala pitanja vezana za kontrolu malog i lakog oružja u regionu.

U 2017. godini, uz novčanu podršku SR Njemačke i podršku UNDP-a započeo je projekat „CIAT“, kojim se pruža podrška Graničnoj policiji BiH, u osposobljavanju za identifikaciju, sprečavanje, i borbu protiv nezakonite trgovine oružjem, municijom i eksplozivnim sredstvima. Kroz ovaj projekat izvršena je nabavka 5 mobilnih detektora za otkrivanje eksploziva i tri endoskopa. Ukupna vrijednost projekta je 550.000 eur.

Kako bi upoznao javnost i medije o provedenim aktivnostima u 2017. godini, KO SALW je u decembru mjesecu 2017. godine, održao Press konferenciju na kojoj je medije obavjestio o najznačajnijim rezultatima.

U saradnji sa UNODC, a u cilju pružanja pomoći Radnoj grupi za izradu podzakonskih akata vezanih za obilježavanje oružja, obavljena je studijska posjeta Zavodu za obilježavanje oružja (Beschussamt) - Savezno ministarstvo za nauku, istraživanje i ekonomiju u Beču.

Održana regionalna radionica u Podgorici o analizi izdavanja dozvola za krajnju upotrebu u organizaciji EXBS programa.

Održano je nekoliko zajedničkih sastanaka na temu početka implementacije novog projekta podrške EU a u okviru sprovođenja odluke Savjeta Evropske unije 2016/2356/CFSP usvojene 19. decembra 2016. godine.

Organizovano je i koordinirano uništavanje oružja u mjesecu aprilu, julu i decembru, a posebno je obilježen i medijski obrađen Međunarodni dan uništavanja oružja 9. jul.

Organizovan nastavak regionalne obuke vezane za fizičku sigurnost i upravljanje zalihama SALW-a. (Dures 13-17.11.2017.godine).

Predstavnici KO SALW redovno učestvuju na regionalnim SALW konferencijama i ostalim skupovima bitnim za problematiku SALW.

PROBLEMI U RADU KO SALW

U realizaciji projekata koji su dio Strategije za kontrolu malog oružja i lakog naoružanja u BiH, većina projekata realizuju se putem donatorskih sredstava međunarodnih organizacija (EXPLODE, SECUP itd). Problemi pri realizaciji projekata vidljivi su zbog nedostatka finansijskih sredstava iz budžeta BiH.

NAJZNAČAJNIJE AKTIVNOSTI PROVEDENE U IZVJEŠTAJNOM PERIODU:

U izvještajnom periodu, posebna pažnja je bila usredotočena na nastavak usklađivanja zakonodavstva s međunarodnim standardima, daljnjem unapređenju kontrole unutarnjeg i vanjsko-trgovinskog prometa oružja, smanjenju incidenata počinjenih oružjem i broja nelegalnog oružja u posjedu građana, unapređenju građanskog povjerenja u institucije u Bosni i Hercegovini na svim razinama vlasti, kao i smanjenju viškova malog oružja i lakog naoružanja u posjedu Ministarstva obrane Bosne i Hercegovine.

Kao najznačajnije aktivnosti može se izdvojiti podatak da je većina institucija uskladilo Zakone o oružju sa Direktivom Vijeća 91/477/EEZ i 51/2008 (preostalo je da Unsko-sanski kanton i Posavski kanton usvoje zakone koji su u skupštinskoj proceduri.

U toku je izrada podzakonskih propisa vezano za obilježavanje malog i lakog oružja, čime će se propisati procedure u toj oblasti i ubuduće moći pratiti tok kretanja oružja.

Uništeno je 10.801. komad malog i lakog oružja što je značajna količina uništenog oružja u odnosu na raniji period.

Prikupljeni su statistički podaci o legalnom oružju u posjedu građana u BiH, te se sada mogu pratiti trendovi za svaku godinu.

Započete su aktivnosti na rekonstrukciji skladišta u policijskim agencijama u kojima se čuva malo i lako oružje, te će 5 policijskih agencija imati bolje uslove za čuvanje takvog oružja.

Tokom izvještajnog perioda provedene su operativne policijske akcije u kojima je prikupljena značajna količina nelegalnog malog i lakog oružja.

Nastavljene su aktivnosti na uništavanju viškova naoružanja u posjedu Oružanih snaga BiH.

V. PRIJEDLOG ZAKLJUČAKA

Imajući u vidu navedeno, predlažemo da Vijeće ministara Bosne i Hercegovine usvoji sljedeće zaključke:

1. Usvaja se "Izveštaj o radu Koordinacionog odbora za kontrolu malog oružja i lakog naoružanja za 2017. godinu";
2. Preporučuje se nadležnim entitetskim, kantonalnim i tijelima Brčko Distrikta BiH, da nastave sa usklađivanjem zakonodavstva o oružju u skladu sa najnovijim izmjenama Direktive o nadzoru nabavke i posjedovanja oružja Vijeća i Parlamenta EU broj 2017/853.
3. Zadužuje se Državni koordinator za kontrolu malog oružja i lakog naoružanja da Izveštaj dostavi i Zajedničkoj komisiji za odbranu i sigurnost BiH Parlamentarne skupštine Bosne i Hercegovine, u vidu informacije radi primanja k znanju.